

եւ մեծ քաղաք է եղել, որի բնակիչների մեծամասնութիւնը քրիստոնեաներ են եղել: Այդ մասին մենք ունինք եւ մի աւելի հաստատուն պատմական փաստ: Մեզ յայտնի է, որ 1330 թուին, Հռովմի Պապը, Սուլթանիյէ քաղաքի արքեպիսկոպոս նշանակեց Յովհաննէս Կոր անունով եկեղեցականին (Jean de Cor): Արքեպիսկոպոսական աթոռ հաստատելը մի քաղաքում՝ ցոյց է տալիս, որ քրիստոնեաների մեծ բազմութիւն պէտք է եղած լինէր այդտեղ. այդ քրիստոնեաները Հայ էին, որոնց մի մասը՝ երեւի Ունիտորների ջանքերով՝ ընդունեցին կաթոլիկէականութիւն¹:

Երեւում է նոյնպէս, որ Հայեր եղել են նաեւ հռչակաւոր Ռէյ քաղաքում: Ասիայի այդ ամենահռչակաւոր քաղաքի մասին, որի աւերակներն այսօր գտնւում են Թէհրանի մօտ, պատմագիրները հրաշալիք են պատմում: Իննբորորդ դարում Ռէյ քաղաքն ունէր 96 թաղ, իւրաքանչիւր թաղ ունէր 46 փողոց, իւրաքանչիւր փողոց — 400 տուն եւ 10 մզկիթ. կար 6400 դպրոց, 16.600 բաղնիք, 15.000 աշտարակ, 12.000 ջրաղաց, 17.000 ջրանցք, 13.000 քարվանսարայ: Մեծ շահավաճառ քաղաք էր, եւ կոչւում էր «Տիեզերքի վաճառատունը», ուստի եւ անկասկած է՝ որ այդտեղ Հայերի մեծ բազմութիւն պէտք է լինէր: Ռէյը կործանուեց ԺԱ. եւ ԺԲ. դարում Թաթարներից:

¹ Nouvelles Annales des Voyages par V. de S.-Martin. Paris 1852, Oetobre.